

# 4

# LO LUS NUG



**Daws Teebmeem Kaus Menyuan Los  
Ntawm Txojmoo Zoo Uas Ciaj Sia**

# 4 LO LUS NUG

## Daws Teebmeem Kaus Menyuam Los Ntawm Txojmoo Zoo Uas Ciaj Sia

Txojkev kawm no yog qhia rau cov uas xav paub tej uas Vajtswv hais thiab nqua hu peb los tsomkwm txojhia, thaum lawv ua tib zoo xav saib yuav hais thiab ua li cas rau txojkev kaus menyuam. Koj yuav nkag siab yam teebmeem no mee, thiab paub yuav ua li cas rau tej kev nyuaj siab ntawm kev kaus menyuam kom ua rau Vajtswv tau ntsejmuag yog koj qhib koj phau Vajluskub thiab teb 4 lo lus no:

- 1) Vajtswv hais li cas txog tibneeg txojhia, thiab txojhia uas nyob hauv nruab thiab?
- 2) Vajtswv hais li cas txog tus neeg uas tsis muaj txim raug tua tuag thiab kev kaus menyuam?
- 3) Yuav ua li cas peb thiaj coj tau txoj koob hmoov ntawm Txojmoo Zoo mus rau cov neeg uas tau kaus menyuam kom lawv tau txais kev zam txim thiab kev cawm dim?
- 4) Vajtswv nqua hu kom peb yuav tsum ua li cas los tawmtsam txojkev uas tua cov tibneeg tsis muaj txim, thiab lwm tus twb ua tes haujlwm no li cas lawm?

Phau ntawv 4 lo lus nug no thaum chivthawj tau npaj rau cov ntseeg nyob Suav teb. Cov thawjcoj Pawgntseeg ntawd cheem tsum ib txojkev cob qhia kom luv, mee, thiab yooj yim rau 3 lab leej neeg kom *paub, ua raws*, thiab *qhia* Vajtswv Txojlus uas ntsis txog tibneeg txojhia tej teebmeem li kev kaus menyuam. Nws ncha sai heev mus rau sab Nyablaj, Cuba, thiab lwm lub tebchaws uas muaj kev kaus menyuam, tua menyuam, tua vim xav tau menyuam tub (tua cov menyuam ntxhais). Thaum uas koj kawm 4 lo lus nug no ces koj tabtom koom nrog cov ntseeg thooib ntiajteb daws tej teebmeem kaus menyuam los ntawm Txojmoo Zoo uas ciaj sia.

### Lus nug 1: Vajtswv hais li cas txog tibneeg txojhia, thiab txojhia uas nyob hauv nruab thiab?

Qhib lus: Peb txojkev kawm txog tibneeg txojhia ua ntej yog saib rau ntawm Vajtswv, tom qab ntawd saib txog tibneeg txojhia, thiab txojhia uas nyob hauv leej niam plab thiab.

#### Vajluskub hais li cas txog txojhia?

- 1) Vajtswv yog txojhia:
  - “Tus neeg uas nrhiav Kuv yog tus uas nrhiav txojhia” (Pajlug 8:35).
  - “Nws yog tibneeg txojhia” (2 Kevcai 30:20).
- 2) Vajtswv pub txojhia:
  - “Vajtswv yog tus tswj txhua yam tsiaj thiab tibneeg txojhia.” (Yauj 12:10).
- 3) Vajtswv khuvleej txojhia:
  - Nws yog tus tuav tibneeg txojhia (Phau Ntawv Nkauj 54:4).
  - Nws yog tus cawm txojhia (Phau Ntawv Nkauj 72:14).
  - Nws yog tus tsomkwm txojhia (Phau Ntawv Nkauj 121:7).
- 4) Vajtswv Leej Tub, Yexus Khetos, yog khoomplig txojhia:
  - Tsw Yexus yog qhov kaj rau txojhia (Yauhas 8:12).
  - Tsw Yexus yog tus muaj txojhia nplua mias (Yauhas 10:10).
  - Tsw Yexus yog txojhia ib txhis (Yauhas 3:16).
- 5) Tsw Yexus Txojmoo Zoo yog txojhia:
  - “Peb zoo li tej tshuaj tsw qab uas Yexus Khetos muab fij rau Vajtswv... yog tej pa uas ua rau lawv tau txojhia” (2 Kauleethaus 2:16).



Rub nqis ntaub ntawv taw qhia nyob rau hauv tus cim no:

[baovemamsong.org/tai-lieu/tieng-hmong/](http://baovemamsong.org/tai-lieu/tieng-hmong/)

## **Vajtswv saib tej uas Nws tsim tau los yam twg muaj nqis tshaj?**

Vajtswv txojkev zoo siab tshaj ntawm tej uas Nws tsim yog tibneeg. Tibneeg txojkia yog yam uas zoo tshaj ntawm Vajtswv txojkev tsim.

- “Thaum kuv tsa qhovmuag ntsia saum lub ntuj uas Koj tsim cia, kuv pom lub hli thiab tej hnuqbub uas Koj muab teeb nyias nyob muaj nyias chaw, neeg ntiajteb tsimtxiaj npaum li cas Koj thiaj nco txog lawv? Noobneej zoo npaum twg, Koj thiaj hlub lawv ua luaj? Koj tsim lawv los ua tus yau ntawm Koj; Koj thiaj pub lawv muaj hwjchim thiab meejomom” (Phau Ntawv Nkauj 8:3-5).

## **Yam dabtsi ua rau tibneeg txojkia muaj nqis ua luaj?**

Qhov uas tibneeg txojkia muaj nqis vim Vajtswv txiav txim siab tsim tibneeg zoo li Nws tus yam ntxwv.

- “Vajtswv hais tias, ‘Nimno peb yuav tsim neeg kom muaj yam ntxwv zoo li peb; thiab lawv yuav muaj hwjchim kav tagnrho tej ntses hauv hiavtxwv, tej noog saum nruab ntug, tej tsiaj nyeg, tsiaj qus, tsiaj loj tsiaj me thiab kav thooob plaws lub ntiajteb no.’ Yog li ntawd, Vajtswv thiaj tsim neeg, kom lawv muaj yam ntxwv zoo li Vajtswv ntag. Nws tsim muaj tus txivneej thiab tus pojniam” (Chivkeeb 1:26-27).

## **Peb yuav hais tau tias tibneeg txojkia muaj nqis zoo li cas?**

- *Tus nqi sab hauv:* Txhua tus tibneeg puavleej muaj tus nqi uas nyob sab hauv vim tibneeg tau tsim zoo li Vajtswv tus yam ntxwv. Neeg ntiajteb tej kev xav mas hais tias tibneeg muaj nqis ntau lossis tsawg, tsimnyog tsoimkwm lossis tsis tsimnyog yog los ntawm lawv tes haujlwm thiab lub peevxwm. Tiamsis Vajluskub hais tias, yog koj yog tibneeg ces koj yeej muaj nqis heev, vim koj tau tsim zoo li Vajtswv tus yam ntxwv.
- *Tus nqi sib txig sib luag:* Tagnrho txhua leej txhua tus, txivneej thiab pojniam, zoo tes zoo taw lossis ceg tawv, thiab txhua haivneeg puavleej muaj nqis sib txig sib luag vim tau tsim zoo li Vajtswv tus yam ntxwv.
- *Tus nqi tshwjxeeb:* Tibneeg muaj nqis tshaj txhua yam uas tau tsim los. Yam uas tseemceeb yog saib koj yuav tua ib tus npua los yug ib tus menyuam lossis tua ib tus menyuam los yug ib tus npua. Muab tibneeg txojkia tua yeej ibtxwm yog muab txojkia mus pauv tej yam uas tsis muaj nqis cuag li txojkia (nyiaj xiaj, koob npe, kev tau zoo).
- *Tus nqi ib txhis:* Vim peb muaj Vajtswv tus yamntxwv uas nyob mus ib txhis ces peb muaj nqis tshwjxeeb thiab muaj feem yuav tau nrog Vajtswv nyob mus ib txhis lossis raug cais tawm ntawm Nws. Cov ntseeg yuav tsum ua ncaj ncees rau txhua leej txhua tus ntawm lawv tej lus hais thiab tes haujlwm, koj sawvdaws los lees txim thiab ntseeg Tswv Yexus Khetos kom tau txais txojkia ibtxhis.

## **Qhov uas tau tsim zoo li Vajtswv tus yam ntxwv txhais li cas?**

- Tagnrho txhua tus tibneeg puavleej tau Vajtswv pub muaj cai ua neej, hu ua txojcai uas ibtxwm muaj, thiab nyob rau hauv ntawd, txojcai uas muaj feem ua neej yog txoj uas tabpov rau tagnrho lwm txoj.
- Peb muaj ib tes haujlwm uas ua zoo yog tsoimkwm cov neeg pluag txojcai (Pajlug 29:7), cov neeg uas raug saib tsis taus (Pajlug 31:5), cov uas raug caij tsuj (Pajlug 31:8), cov uas txomnyem (Pajlug 31:9), vim lawv yog thawj pab uas tsis muaj neeg quavntsej lossis tsis tau txais lawv txojcai muaj feem ua neej, thiab lawv tsis muaj peevxwm tivthaiv tau lawv tus kheej.
- Muaj kev sib txuas ntawm txojkev hlub Vajtswv thiab hlub lwm tus; Yog koj caij tsuj cov neeg pluag, ces yog koj saib tsis taus Vajtswv (Pajlug 14:31). Siv tib lub qhovncauj qhuas Vajtswv thiab foom phem rau cov uas tau tsim zoo li Vajtswv tus yam ntxwv yog yam uas txajmuag heev thiab tsis tsimnyog (Yakaunpau 3:9).
- Tibneeg tus nqi sab hauv, sib txig sib luag, tshwjxeeb, thiab ibtxhis yog lub zog uas txhawb peb ua txhua yam haujlwm ncaj ncees thiab zoo rau cov neeg txomnyem, tsis muaj peevxwm, thiab raug caij tsuj (Yauj 29:12-17; 30:13-15).

## **Vajtswv saib txojkev muaj tub ki, menyuam, thiab tsevneeg zoo li cas?**

Tsis zoo li tibneeg xav, Vajtswv hlub menyuam thiab samhwm kom peb txais tos lawv.

- “Vajtswv foom koob hmoov rau nkawd thiab hais tias, ‘Neb cia li muaj tub muaj ki kom coob, neb tej xeebntxwv yuav huamvam mus nyob thooob plaws txhua qhov chaw kom puv ntiajteb thiab lawv yuav kav tagnrho lub ntiajteb. Kuv tsa neb kav tej ntses hauv hiavtxwv, tej noog uas ya saum nruab ntug, thiab txhua tsav yam tsiaj uas nyob hauv ntiajteb no” (Chivkeeb 1:28).

## **Raws li Vajluskub, tibneeg txojhia pib muaj thaum twg? Tus uas tsis tau yug tawm los puas yog ib tus tibneeg thiab?**

Vajtswv qhia hais tias thaum xeebtub ces yog lub hauvpaus uas pib muaj sia thiab Vajtswv tsis feebpij menyuum raws li sijhawm loj hlob xws li: Cov menyuum tsis tau yug, cov menyuum mos liab, cov uas nyuam qhuav paub mus kev, lossis tub ntxhais hluas. Vajtswv saib txhua tus puavleej yog tibneeg thiab hu tias lawv yog Nws tej menyuum.

### **1) Hauv Vajluskub Qub:**

- Nyob rau lus Henplais, lo lus ‘menyuam’ (habanim) tau siv rau tus menyuum uas twb yug lawm thiab tus uas tsis tau yug huv tibi. Hauv Chivkeeb 25:22, hais txog Lenpekas nkawm menyuum ntxaib, peb pom hais tias: “Ob tus menyuum sib tuam hauv leej niam plab.” Nyob rau lwm qhov lo lus no tau siv los hais txog menyuum. Pivxam, Phau Ntawv Nkauj 113:9, “Nws pub tus pojniam uas tsis muaj menyuum kom muaj tsev nyob; nws pub tus pojniam ntawd muaj menyuum kom nws muaj kev zoo siab.”
- Daviv siv lo lus “kuv”. Nws pom hais tias nws yog ib tus tibneeg txawm yog thaum uas nws tseem nyob hauv nruab thiab lossis thaum uas sau ntawv nkauj.
  - “Koj yog tus tsim kuv lub cev txhua yam huv tibi, thiab Koj yog tus uas puab kuv rau hauv kuv niam plab” (Phau Ntawv Nkauj 139:13).

### **2) Hauv Vajluskub Tshiab:**

- Ntawm lus Kilis, lo lus ‘menyuam’ (brephos) tau siv rau cov uas tsis tau yug thiab cov menyuum mos liab huvsu.
  - “Thaum Elixanpes hnov dheev Malis lub suab hais rau nws, ces nws tus menyuum hauv plab txawm nti cuag dabtsi” (Lukas 1:41).
  - “Lawv pom Malis thiab Yauxej, thiab pom tus menyuum pw hauv ib lub dab zaub” (Lukas 2:16).
- Yauhas Npatitus, yog ib tus menyuum uas tsis tau yug los *twb ua zoo li yam uas tibneeg ua uas yog dhia zoo siab lawm*. Nws pehawm Vajtswv Leej Tub, tus uas tsis tau yug tawm los tiamsis yeej yog tibneeg. Qhov no yog ib txojkev pehawm hauv nruab thiab mus rau hauv nruab thiab.
  - “Thaum Elixanpes hnov dheev Malis lub suab hais rau nws, ces nws tus menyuum hauv plab txawm nti cuag dabtsi..., Elixanpes hais nrov nrov hais tias,... ”Koj tus menyuum hauv plab los tau koob hmoov... Thaum kuv hnov dheev tej lus uas koj hais rau kuv, kuv tus menyuum uas nyob hauv kuv plab zoo siab thiab nti cuag dabtsi” (Lukas 1:40-44).
- Tswv Yexus tus kheej – *nyuam qhuav xeeb thiab tsis tau yug tawm los – twb tuaj txog lawm*. Nws tabtom loj hlob ib yam li lub lwg ntshav (tau ob peb txoog teev xwb) lossis zoo li ib lub cev menyuum uas me heev (tau ob peb nyuag hnuv lossis ib lub asthiv xwb) thaum Yauhas, kuj yog ib tus menyuum tsis tau yug los pehawm Nws hauv nruab thiab. Ua cas peb thiaj paub tau qhov no?

Raws li Lukas 1, Malis tsis tau suab menyuum thaum timtswv tshwm los thiab hais tias nws yuav xeebtub los ntawm Vaj Ntsujplig (1:26). Malis tau hnov xov zoo thiab “maj nroog” mus saib Elixanpes (Lukas 1:39). Raws li tej txojkev uas mus, Malis tau mus kwvlam li 115-150 km (70-95 mais) txog rau Elixanpes lub tsev nyob rau “sab laj roob nram Yudas” (1:39). Txawm yog cov tub tshawb nrhiav Vajluskub tsis paub meej thajchaw no tiamsis feem coob puavleej ntseeg hais tias yog hais txog tej toj roob uas nyob rov yav qab teb thiab sab hnuv poob ntawm Yeluxalees, qhov chaw uas nws tus txiv tabtom ua povthawj hauv tuamtsev (1:5-9). Thaum Malis tuaj txog ces Malis twb xeebtub lawm.

Tswv Yexus tau xeeb tom qab uas timtswv mus lawm thiab ua ntej uas tuaj cuag Elixanpes. Tswv Yexus nyob hauv leej niam plab ob peb txoog teev lossis ob peb nyuag hnuv thaum Elixanpes nrog Malis sib tham. Yam uas tshwjxeeb mas yog Yauhas, ib tus menyuum uas tsis tau yug los, twb nti cuag dabtsi vim zoo siab thaum pom Vajtswv Leej Tub los ua tibneeg. Lub sijhawm ntawd ntshe Tswv Yexus me tshaj lub kua tswjmem ntub ntub uas nias rau tom kawg zaj ntawv no tiamsis Nws yeej yog Vajtswv thiab yog Tibneeg tagrho.

Tej yam no tshwmsim thaum Elixanpes tabtom suab menyuam tau 6 lub hlis lawm (1:26). Malis tuaj thiab nrog Elixanpes nyob tau 3 lub hlis, nws rov qab los tsev ua ntej uas Yauhas yug los (1:56-67). Qhov no yog tej uas ua timkhawv qhia hais tias tej yam uas tshwjxeeb hauv Lukas 1:26-44 tau tshwmsim ob peb nyuag hnuv lossis ib lub asthiv xwb.

Nyob rau hauv zaj uas hais txog Yauhas thiab Tswv Yexus no, peb pom hais tias tej no yog tej yam uas qhia meej txog tibneeg ntawm cov menyuam uas tsis tau yug tawm los!

### 3) Thoob plaws phau Vajluskub Vajtswv saib thaum uas xeebtub ces yog lub hauvpaus uas pib keebkwm ntawm tibneeg

Pivxam, Chivkeeb 4:1 hais tias, “Adas nrog Evas uas yog nws pojniam pw, ces Evas txawm xeeb tub... tis npe hu Ka-ees.” Ka-ees lub neej pib thaum uas nws xeeb. Ib yam nkaus li ntawd, Malis tau qhia hais tias yuav xeeb “ib tus me tub” (ib tus txivneej) thiab yug “ib tus me tub” (Lukas 1:31). Elixanpes kuj xeeb “ib tus tub” thiab (Lukas 1:36). Qhov uas qhia txog Vajtswv tes haujlwm no qhia hais tias “xeebtub” yog lub hauvpaus uas pib muaj tibneeg txojhia thiab yeej tshwjxeeb heev (Saib Chivkeeb 4:17; 21:2, Yauj 3:3; Hauxeyas 1:6).

### Kev tshawbfawb puas qhia ib yam Vajluskub tias tibneeg txojhia pib muaj thaum uas xeebtub?

Qhia! Kev tshawbfawb txog menyuam qhia hais tias thaum uas xeebtub ces koj yog: 1) Ib tus tibneeg ciao sia, 2) koj yog koj tsis muaj lwm tus zoo li koj, 3) ib tus tibneeg txij txhua – muaj nyob thiab loj hlob zuj zus hauv nruab thiab.

“Lub lwg ntshav yog qhov uas pib muaj txojhia ntawm ib tus tibneeg tshiab. Tibneeg txojkev loj hlob pib txij thaum uas xeeb, yog lub sijhawm uas tus txivneej cov kab roj ntsha... mus koom nrog tus pojniam cov qe... ces hu ua lub lwg ntshav. Lub lwg ntshav uas tshwjxeeb thiab ciao sia no yog lub cim uas qhia hais tias peb txhua tus pib muaj thiab nyias yeej yog nyias.” - Keith L. Moore & T.V.N. Persaud, *Tibneeg txojkev loj hlob: Clinically Oriented Embryology*, 16.

Saib video hais txog Koj lub neej uas ntej uas yug los (6 feeb): [baovemamsong.org/tai-lieu/tieng-hmong/](http://baovemamsong.org/tai-lieu/tieng-hmong/)

## Menyuam txojkev loj hlob



8 thiv



11 thiv



13 thiv

## Lus nug 2: Vajtswv hais li cas txog tus neeg uas tsis muaj txim raug tua tuag thiab kev kaus menyuam?

Qhib lus: Yam uas Vajtswv hlob tshaj ces Nws tsomkwm tshaj. Peb los ib yam thiab. Lo lus nug 2 no yuav hais txog qhov uas tsomkwm tibneeg txojhia, muaj cai ua neej, thiab qhov uas txov lwm tus txojhia tsis ncaj ncees.

### Vajtswv tsomkwm tej uas Nws hlob tshaj ntawm tej uas Nws tsim zoo li cas?

Vajtswv tsomkwm tibneeg los ntawm ntau yam sib txawv tiamsis yam uas tshwjxeeb tshaj uas Vajtswv tsomkwm tibneeg txojhia yog dhau ntawm Nws tej kevcai uas ua zoo.

- Txoj kevcai txwv: “Tsis txhob tua neeg” (Khiav Dim 20:3).
- Txoj kevcai samhwm: “Hlub koj tej kwvtij zejzoz ib yam li koj hlob koj lub cev. Kuv yog tus Tswv” (Levis Kevcai 19:18).

Txoj kevcai txwv yog txwv qhov uas *txhob txwm* tua tus neeg *tsis muaj txim*. Txoj kevcai samhwm yog nqua hu nqis tes tivthaiv tibneeg txojsia. Pivxam, 2 Kevcai 22:8 hais tias: “Thaum nej ua tsev tshiab, nej yuav tsum xov puagnicig lub rutsev tus npoo. Neeg thiaj tsis poob thiab tuag, nej thiaj tsis tau ris lub txim ntawd.”

### **Tus tibneeg txojsia uas “tsis muaj txim” txhais li cas?**

Raws li Loos 3:10 ces yeej tsis muaj leejtwg tsis muaj txim li, “yeej tsis muaj ib tug neeg ncaj ncees hlo li.” Lub ntsiab ntawm nqe no qhia hais tias yeej tsis muaj ib tus twg tsis muaj txim tabmeeg Vajtswv li; tagnrho txhua leej txhua tus puavleej muaj txim thiab cheem tsum tus Cawmseej.

Tiamsis, nyob rau lwm qhov, Vajluskub hais txog cov neeg uas tsis muaj txim (Pajlug 1:11; 6:16-17). Thaum Vajtswv hais txog txojsia uas tsis muaj txim lossis tua neeg tsis muaj txim Nws tabtom hais txog:

- 1) *Cov neeg uas tsis muaj txim tabmeeg kevcai*. Raws li kevcai, txhua tus puavleej tau suav tias tsis muaj txim mus txog thaum uas luag ua tau timkhawv qhia hais tias tau ua txhaum lawm thiaj muaj txim. Hos cov uas raug nkaug yuam kev kuj tsis muaj txim.
  - “Tsis txhob txiav txim tsis ncaj rau tus neeg pluag thaum nws tuaj rau hauv tsev tu plaub. Tsis txhob lam nrhiav lus tsis tseeb liam lwm tus, thiab tsis txhob tua cov neeg uas tsis muaj txim dabtsi povtseg. Kuv yuav rau txim rau txhua tus uas ua phem li ntawd” (Khiav Dim 23:6-7).
- 2) *Cov uas tsis paub qhov phem thiab qhov zoo*. Qhov no yog cov uas menyuam hauv nruab thiab, menyuam mos liab, menyuam yau, thiab cov neeg mob pajhlwb uas feeb tsis tau qhov yog thiab qhov txhaum.
  - “Thaum tus metub ntawd paub tab lawm, nws tsis nyiam ua qhov phem, tiamsis nws nyiam ua qhov zoo xwb” (Yaxayas 7:16) (Saib ntxiv 2 Kevcai 1:39; Yelemis 19:4).

### **Vajtswv ua li cas rau qhov uas txhob txwm tua cov neeg tsis muaj txim, lossis hais raws li Vajluskub uas yog ua rau cov ntshav dawbhuv nrog?**

Qhov ntawd ua rau Vajtswv npau taws heev thiab Nws yuav txiav txim rau cov uas tua tus neeg tsis muaj txim ntawd.

- “Kuv yog tus Tswv uas kav ib puas tsav yam, koj cia li qhia Kuv tej lus rau lub nroog hais tias, ‘Vim koj tau tua koj cov neeg ntau tus thiab pe mlom ua rau koj tsis huv, koj lub sijhawm kawg twb los txog lawm. Qhov uas koj tua neeg ua rau koj muaj txim...’” (Exekees 22:3-4).
- “Tus Tswv tso cov Npanpiloos...tuaj tua Yehauyakees thiab rhuav lub tebchaws Yudas... Tej no muaj raws li tus Tswv tej lus uas hais tias, nws yuav muab cov Yudas ntiab tawm ntawm nws mus, vim tej kev txhaum uas Vajntxwv Manaxes ua thiab tua cov neeg ua tsis muaj txim. Tus Tswv yeej zam tsis tau lub txim uas Manaxes tua neeg ntawd li” (2 Vajntxwv 24:2-4).

### **Vajtswv ua li cas rau qhov uas peb ua twjywm lossis tsis quavntsej thaum muaj tibneeg tsis muaj txim raug tua tuag?**

Ua rau cov ntshav tsis muaj txim nrog yog ua txhaum Vajtswv txoj kevcai txwv: “Tsis txhob tua neeg.” Tsis nqis tes pab thaum pom cov neeg tsis muaj txim raug luag txhob txwm tua yog ua txhaum Vajtswv txoj kevcai samhwm: “Hlub koj tej kwvtij zejzog ib yam li koj hlub koj lub cev.” Cov uas tua neeg thiab cov uas cia luag tua neeg puavleej ua txhaum Vajtswv tej kevcai tib yam. Vajtswv qhia rau Nws haivneeg tawmtsam txojkev tua neeg los ntawm qhov uas lees yuav yus tes haujlwm ua zoo uas yog yuav tsum ua raws li txoj kevcai txwv thiab txoj kevcai samhwm huv tibi.

- “Cov thawjcoj...hais tias, ‘Peb tsis tau tua tus neeg no, thiab peb tsis paub hais tias yog leejtwg tua. Yog nej ua raws li tej lus uas tus Tswv kom nej ua, nej thiaj yuav tsis tau ris tus uas tua tus neeg ntawd lub txim’” (2 Kevcai 21:6-9).

Txhob txwm tua tej menyuam uas tsis muaj txim ua rau Vajtswv chim heev. Qhov uas hais tias: “Qhov ntawd tsis yog kuv haujlwm” thiab tsis quavntsej txog qhov uas tej menyuam raug tua puavleej tsimnyog rau txim tib yam.

“...Tiamsis yog cov pejxeem tsis quavntsej tus uas muab nws tus menyuam txi tus vajtswv Maulej...Kuv yuav tawmtsam tus ntawd...” (Levis Kevcai 20:4-5).

## **Vajtswv tseem ua li cas ntxiv rau qhov uas txhob txwm tua tus neeg tsis muaj txim thiab ua ntsej lag muag dig cia yam ntawd tshwmsim?**

- 1) Nws yuav *khiav tawm* ntawm tus uas tua neeg ntawd, tsis mloog lawv tej lus thov mus txog thaum uas lawv lees txim.
  - “Thaum nej tsa tes thov Kuv, Kuv yuav tsis ntsia nej, txawm yog nej yuav thov ntev npaum li cas los Kuv yuav tsis mloog, rau qhov nej tej tes tua neeg. Ntxuav kom nej huv, tso plhuav tej kev phem kev qias uas Kuv pom nej ua no tseg. Tso plhuav kev phem kev qias tseg thiab xyaum ua neeg zoo nrhiav kev ncaj ncees, pab tej neeg uas raug tsimtxom, ua ncaj rau cov menyuam ntsuag thiab pab cov pojntsuam” (Yaxayas 1:15-17).
- 2) Vajtswv *ceebtoom* tias cov neeg uas ua siab phem, cov uas tua tus neeg tsis muaj txim vim yus xav tau yam ub yam no yuav raug txim.
  - “Nej ua neej nyob hauv ntiajtec no, nej muaj noj seem noj so thiab niaj hnuv muaj kev lomzem kawg li. Nej txav kom nej rog ib yam li tus tsiaj uas luag txav cia tua noj. Nej rau txim thiab tua tus neeg uas tsis muaj txim los nws tsis tawmtsam nej li” (Yakaunpau 5:5-6).
- 3) Vajtswv *coglus* rau cov uas raug luag tua tuag hais tias, lawv txojhia (cov ntshav) muaj nqis heev rau Vajtswv thiab Vajtswv yuav rau txim rau cov uas tua lawv ntawm rooj txiav txim.
  - “Vajtswv yeej nco ntsoov txhua tus uas tiv kev txomnyem; nws nco ntsoov lawv tej suab quaj, thiab nws rau txim rau cov neeg uas tsimtxom lawv (Phau Ntawv Nkauj 9:12).

## **Vajtswv puas suav tias cov uas kaus menyuam zoo ib yam li tua menyuam?**

Lo lus “kaus menyuam” zoo ib yam li tej kev tuag neeg tiam tshiab no (tua tibneeg, tua kom tu noob...) tsis tshwm rau hauv Vajluskub, tiamsis Vajtswv txwv kev kaus menyuam vim yog tua tibneeg (2 Kevcai 5:17). Tua tibneeg yog txhob txwm tua ib tus tibneeg uas tsis muaj txim. Yog hais tias tus menyuam leej niam plab yog tibneeg (peb yeej paub meej qhov ntawd) ces kaus menyuam yog txhob txwm tua ib tus menyuam uas tsis muaj txim dabtsi li.

## **Vajluskub tseem qhia li cas txog yam uas muaj nqis ntawm menyuam?**

- 1) Nyob rau ntawm txhua txojhia uas tsis muaj txim, Vajtswv hluv tej menyuam heev thiab xav kom lawv tau txais kev tsoomkwm.
  - “Tus uas lees yuav tus menyuam yaus no ntawm Kuv lub npe, kuj yog tus ntawd lees yuav Kuv. Yog leejtwg ua rau cov menyuam uas ntseeg Kuv no ib tug ua txhaum, cia li muab hlua khi ib txhib zeb uas loj dai rau tus ntawd cajdab, thiab coj nws mus pov rau hauv hiavtxwv yuav zoo dua” (Mathais 18:5-6).
- 2) Nyob rau txhua yam uas peb tua tibneeg, qhov uas muab menyuam coj mus tua fij (txi) yog ib yam uas saib tsis taus Vajtswv.
  - “Nej cov Yixalayeas txhua tus lossis cov neeg txawv tebchaws uas nrog nej nyob ua ke, yog leejtwg muab nws cov menyuam rau luag tua txi tus vajtswv Maulej, ces kom tej neeg zejzoes muab pobzeb ntaus tus ntawd kom tuag mus... yog cov pejxeem tsis quavntsej tus uas muab nws tus menyuam txi tus vajtswv Maulej thiab tsis muab tus ntawd tua kom tuag, Kuv yuav tawmtsam tus ntawd thiab nws tsevneeg thiab cov neeg uas tso Kuv tseg mus pe tus vajtswv Maulej. Kuv yuav muab lawv rho tawm ntawm Kuv haivneeg mus” (Levis Kevcai 20:2-5).
- 3) Vajtswv saib txojkev muab menyuam tua fij yog ib qhov uas tua Vajtswv tej menyuam txomnyem heev.
  - “Koj muab tej tub tej ntxhais uas koj yug rau Kuv coj mus tua fij rau tej mlom. Koj mus ua kev nkauj kev nraug los tseem tsis txaus koj siab, koj thiaj coj Kuv cov menyuam ntawd mus tua fij rau tej mlom no los?” (Exekees 16:20-21).
- 4) Muab menyuam tua fij yog ib yam uas txhaum loj kawg nkaus uas Vajtswv suav tias yog kev phem kev qias *xav tsis txog li*.
  - “Lawv ua ib lub thaj rau Npa-as hauv lub Hav Hinoos, coj lawv tej tub tej ntxhais mus tua hlawv fij rau tus vajtswv Maulej. Kuv tsis tau hais kom lawv ua tej ntawd, thiab Kuv tsis tau xav hais tias lawv



yuav ua tej ntawd kom cov Yudas ua txhaum” (Yelemis 32:35).

### **Kaus menyuam puas yog muab menyuam tua fij?**

Yog! Yeej yog muab menyuam tua fij, tsuas yog tsis ua nyob rau tej kev ntseeg dab xwb. Tagrho ob yam ntawd puavleej ntsis txog:

- Niamtxiv txhob txwm tua yus tus menyuam.
- Muab yus tus menyuam lub cev hlawv lossis txiav.
- Muab tibneeg txojsia koj mus pauv lwm yam.

Yav thaum ub luag muab menyuam tua fij yog xav kom tsis raug ris tej yam uas tsis zoo (ntuj qhua teb nkig) lossis kom tau txais tej yam zoo ntawm tej dab (xws li kom ntaus yeej rog). Nyob rau peb tiam no, luag kaus menyuam kom tsis raug txajmuag, poob ntau yam los tu, teebmeem,... lossis kom kawm tiav ntaub ntawv, txuag tau nyiaj txiag, npog yus lub txim uas ua nkauj ua nraug lossis kom lwm tus txaus siab rau yus. Yam uas mob siab tshaj plaws thaum paub khuvxim txog qhov uas yus kaus menyuam ces yog yus twb muab yus tus menyuam koj mus pauv tej yam uas tsis muaj nqis li yus tej menyuam lawm.

### **Yog li qhov uas phua vim menyuam xeeb rau sab nraum lub tsevtub nej? Qhov ntawd puas yog ib yam kev kaus menyuam thiab?**

Tsis yog! Suab menyuam sab nraum lub tsevtub yog thaum uas lub lwg ntshav ua zes rau hauv txoj kab qe tsis yog hauv tsevtub. Nws yeej ciaj tsis taus, yog tsis muab rho povtseg ces yuav ua rau leejniam tuag. Nco ntsoov hais tias, kaus menyuam yog **txhob txwm** tua menyuam. Thaum phua vim menyuam xeeb sab nraum lub tsevtub, txawm yog yeej paub hais tias tus menyuam yuav tuag los lub homphiaj yog cawm leejniam tsis yog txhob txwm tua tus menyuam. Yog yav tom ntej no tej kev txawj ntse sab kws tshuaj muaj peevxwm muab lub lwg ntshav thawb tau mus rau hauv lub tsevtub ces qhov ntawd yog ib yam uas tsimnyog yuav tau ua.

Saib duab lossis video hais txog kev kaus menyuam “Ntawm no yog kev kaus menyuam” (2 feeb):

[www.baovemamsong.org/tai-lieu/tieng-hmong/](http://www.baovemamsong.org/tai-lieu/tieng-hmong/)

## **Lus nug 3: Yuav ua li cas peb thiaj koj tau txoj koob hmoov ntawm Txojmoo Zoo mus rau cov neeg uas tau kaus menyuam kom lawv tau txais kev zam txim thiab kev cawm dim?**

Qhib lus: Lo lus nug 3 yuav soj ntsuam txog Vajtswv txoj koob hmoov rau peb tibneeg, txij ntawm qhov uas yog neeg txhaum mus txog qhov uas txais yuav tej uas Tswv Yexus tau ua, kom tau txais ib lub siab uas dawbhuv thiab ua neej li ib yam timkhawv rau Vajtswv txojkev hlub.

### **Kuv yuav ua cas thiaj tau zam txim thiab cawm dim ntawm yus tej kev txhaum, txawm yog kev kaus menyuam thiab?**

- 1) *Lees yuav li* Vajtswv hais tias tej uas koj tau ua yog kev phem thiab Vajtswv muaj cai rau txim rau koj.
  - “Kuv lees kuv tej kev txhaum, kuv paub hais tias kuv yeej tau ua txhaum lawm. Kuv tau ua txhaum rau Koj, rau Koj tib leeg xwb, thiab ua tej uas Koj pom hais tias yog kev phem kev qias. Yog li ntawd, qhov uas Koj txiav txim rau kuv yeej yog kev yog cai, thiab Koj yeej muaj cai rau txim rau kuv lawm” (Phau Ntawv Nkauj 51:3-4).
- 2) *Lees koj tej kev txhaum thiab thov* Vajtswv zam txim rau koj. Daviv “qaug zog zis” thaum tsis kam lees txim. Nws pom hais tias txojkev txhaum txajmuag heev thiab zoo ib yam li lub nra hnyav ua rau nws lub zog yaj ntshis li raug tshav ntuj kub ziab. Nws thiaj txiav txim siab lees txim:
  - “Thaum kuv tsis lees kuv tej kev txhaum, kuv tsis muaj zog, rau qhov kuv quaj tas hnuv. Tus Tswv, Koj rau txim rau kuv nruab hnuv hmo ntuj, kuv lub zog yaj ntshis ib yam li tej hws uas lub caij ntuj qhua tshav ntuj ziab qhuav lawm. Thaum ntawd kuv lees kuv tej kev txhaum rau Koj, kuv tsis zais tej uas kuv ua txhaum ib qho li, kuv lees kuv tej kev txhaum huv tibi rau Koj, thiab Koj zam tagrho kuv tej kev txhaum huv tibi mus” (Phau Ntawv Nkauj 32:3-5).



- 3) *Cia siab* tagnrho rau hauv Tswv Yexus qhov khoom pub uas ris Vajtswv txojkev chim saum tus ntoo khaublig hloov koj chaw.
  - “Twb yog vim peb tej kev txhaum Nws thiaj raug ntaus nqaj ntuag ntshav nrog, twb yog vim tej kev phem uas peb ua Nws thiaj raug nplawm. Qhov uas Nws raug txim txomnyem ntsuav, yog pab kom peb tau nyob kaj siab lug, Nws raug nplawm twb yog kho kom peb tej kev mob kev nkeeg zoo” (Yaxayas 53:5).
  - “Vim Yexus [Khetos] tuag txhiv peb lub txim, Vajtswv thiaj zam txim rau peb. Vajtswv txojkev hlub loj kawg li” (Efexus 1:7).
- 4) *Siv* txoj xov zoo no rau hauv koj lub siab thiab hloov koj txojkev txhaum mus ua lus timkhawv.
  - “...Vajtswv tus uas muaj sia nyob mus ibtxhis, Nws tus Ntsujplig kom Yexus muab Yexus lub cev uas zoo kawg nkaus pub rau Vajtswv theej neeg lub txhoj. Nws cov ntshav ntxuav peb lub siab kom peb dim tej kev txhaum uas peb tau ua los lawm, peb thiaj yuav ua tau Vajtswv tus uas muaj txoj sia nyob tes haujlwm” (Henplais 9:14).
  - “Tus menyuam Yaj cov ntshav thiab Vajtswv Txojlus uas peb qhia twb ua rau lawv kovyeej tus (Xatas) uas nkaug lawv lawm...” (Tshwmsim 12:11).

### **Thaum peb ntseeg Tswv Yexus ces peb ntseeg hais tias Nws tau ua dabtsi rau peb saum tus ntoo khaublig lawm?**

- 1) Peb ntseeg hais tias Tswv Yexus tuag vim *tagnrho* peb tej kev txhaum lawm, txawm yog tej kev txhaum uas peb txajmuag tshaj plaws xws li kaus menyuam thiab.
- 2) Peb ntseeg hais tias Tswv Yexus twb ris txojkev rau txim *txhij txhua* rau peb tej kev txhaum lawm, txawm yog kev kaus menyuam thiab.

### **Loos 6:23 hais tias Vajtswv yeej ncaj ncees thaum rau txim rau peb, yog li yuav ua li cas Vajtswv thiab tseem ncaj ncees thaum Nws zam txim rau peb?**

Vajtswv qhia tshwm Nws txojkev hlub los ntawm qhov uas rau txim rau Tswv Yexus hloov peb chaw. Ntoos khaublig yog txojkev rau txim txhij txhua rau txhua lub txim uas tsimnyog raug. Txawm yog raws li peb tibneeg tej kevcai los, yuav tsis ncaj ncees yog muab ib tus neeg rau txim ob zaug rau nws tib lub txim. Vim li ntawd, Vajtswv yeej ncaj ncees thaum qhia tshwm Nws txojkev ncaj ncees rau txhua tus uas ntseeg Tswv Yexus, vim yeej tsis muaj ib yam dabtsi hauv peb lub neeg uas tsimnyog rau txim yuav tsis raug rau txim li. Vajtswv txojkev ncaj ncees uas rau txim rau peb yav tas los ces nimno ho rov qab tivthaiv peb. “Vim Yexus Khetos tuag theej peb lub txhoj, nimno peb thiaj ua tau neeg ncaj ncees, tsis yog li ntawd xwb, Vajtswv yuav tsis txiav txim rau peb, rau qhov Yexus Khetos cov ntshav twb ntxuav peb tej kev txhaum lawm” (Loos 5:9). Vim li no, Txojmoo Zoo thiaj tau muab hu ua “txojkev zoo siab kawg nkaus rau txhua haivneeg” (Lukas 2:10).

### **Lus nug 4: Vajtswv nqua hu kom peb yuav tsum ua li cas los tawmtsam txojkev uas tua cov tibneeg tsis muaj txim, thiab lwm tus twb ua tes haujlwm no li cas lawm?**

Qhib lus: Nyob ntawm lo lus nug 4 no, peb yuav hla ntawm qhov uas nkag siab tej uas Vajtswv hais txog tibneeg txoj sia mus rau tej uas Vajtswv nqua hu peb ua kom tsomkwm tau tibneeg txoj sia dhau ntawm tej kev tuag uas tsis ncaj ncees. Peb yuav ua li cas thiab peb yuav teb Vajtswv tej lus nqua hu ntawd li cas kom zoo tshaj?

### **Peb yuav muab Vajluskub tej kevcai ua zoo uas ntsis txog kev kaus menyuam hais sau zog li cas? Peb yuav tau ua li cas?**

- 1) Tsis txhob kaus menyuam. Thawj txoj kevcai uas yuav tau coj yog, “tsis txhob tua neeg” (Khiav Dim 20:13). Tsis txhob lam txhob txwm tua cov neeg tsis muaj txim, txawm tias yuav daws tau ib yam teebmeem dabtsi. Kaus menyuam yog txhob txwm tua ib tus tibneeg uas tsis muaj txim. Yog li ntawd, kaus menyuam yog txhaum lawm. Yuav tsum ua siab tawv qhawv tsis txhob muab koj tej menyuam

tua, txawm tias yuav nyuaj npaum li cas, ib yam li koj tsis lam muab koj tus menyuam uas twb muaj 2 xyoos lawm tua kom tuag los daws koj tej kev nyuaj siab.

- 2) Tsis txhob qi muag rau tej kev kaus menyuam. Ua ntsej lag muag dig ces yog ib yam uas txaus siab. Yog koj tsis qi muag thaum ib tus menyuam muaj 2 xyoos raug luag tua ces tsis txhob qi muag rau kev kaus menyuam thiab (2 Kevcai 21:7).
- 3) Siv zog pab kom cawm tau cov neeg tsis muaj txim.
  - “Tsis txhob ua xyem xyav, cia li pab tus neeg tsis muaj txim txhaum uas luag yuav coj mus tua povtseg. Koj yuav hais tias tsis yog koj feem xyuam, tiamsis Vajtswv paub thiab yuav txiav txim raws li koj ua. Nws ntsia ntsoov koj, Nws yeej paub koj lub siab, thiab Nws yuav muab nqi zog rau koj raws li tej uas koj ua lawm” (Pajlug 24:11-12).  
(Lub ntsiab ntawm 24:11 yog “tua neeg” – txhob txwm tua tus uas tsis muaj txim)
  - “Nej cia li tsa cov neeg pluag thiab cov menyuam ntsuag txoj cai; nej cia li ua ncaj rau cov neeg txomnyem thiab cov neeg uas tsis muaj leejtwg pab. Cia li cawm kom cov neeg txomnyem dim ntawm cov neeg siab phem txhais tes” (Phau Ntawv Nkauj 82:3-4).
  - “Cia li pab cov neeg uas lawv tsis muaj cuabkav hais lawv zaj, cia li pab txheem cov tsis muaj txhaum uas tsis muaj chaw vamkhom. Pab txheem cov pluag thiab cov txomnyem txoj cai, pab lawv hais thiab txiav txim kom ncaj ncees” (Pajlug 31:8-9).
- 4) Ua raws li Vajtswv txoj kevcai ua zoo.
  - “Yog nej xav kom lwm tus ua li cas rau nej, nej yuav tsum ua ib yam li ntawd rau lwm tus. Ua li no thiaj raws li Mauxes txoj Kevcai thiab raws li cov cev Vajtswv lus tau qhia tseg lawm” (Mathais 7:12).
  - “Hlub koj tej kwvtij zejzog ib yam li koj hlub koj lub cev” (Kalatias 5:14).
- 5) Zaj uas hais txog tus neeg Xamalis qhia rau peb paub kabke mus pab cawm (Lukas 10:25-27). Nws zoo li ib tus qauv rau kev nqis tes, ua kiag ntawm yus tus kheej, thiab pab tiag tiag. Qhov ntawd yuav ua rau peb poob sijhawm thiab nyiaj txiag tiamsis cawm tau tibneeg txoj sia thiab ua rau Vajtswv tau ntsejmuag.

### **Peb pom tej qauv uas hais txog cov uas ua raws li Vajtswv tej lus nqua hu kom mus cawm cov neeg tsis muaj txim li cas? Lawv ua tes haujlwm ntawd li cas lawm?**

Lawv tau tivthaiv cov neeg tsis muaj txim kom tsis raug tuag nyob rau lawv tiam li cas? Peb yuav saib qee yam qauv, tom qab ntawd yuav saib seb peb yuav siv tau yam no li cas rau tej uas peb yuav ua kom cawm tau tej menyuam uas luag xav muab tua povtseg uas yog muab kaus mus.

#### **1. Tej qauv thiab kabke hauv Vajluskub**

a. *Lunpees* tau cawm Yauxej dim ntawm nws cov kwvtij txojkev tua. Nws siv tej lus uas qhia txog kevcai ua zoo thiab tej lus thov kom tsis txhob ua rau cov ntshav uas tsis muaj txim nrog.

• “Thaum Lunpees hnov lawv hais li ntawd,... nws thiaj hais tias, ‘Cia peb tsis txhob muab Yauxej tua povtseg,... tsis txhob ua kom nws nqaij ntuag ntshav nrog.’ Lunpees hais li no, rau qhov nws xav pab kom Yauxej dim ntawm lawv...” (Chivkeeb 37:21-22).

b. *Cov pojniam daws cev Iziv* tau cawm tej menyuam mos liab kom tsis raug tuag tiam Mauxes. Lawv muaj lub siab tawv, tsis kam ua raws li vajntxwv tej lus samhwm uas tsis ncaj ncees.

• “Tiamsis ob tug pojniam ntawd paub ntshai Vajtswv, nkawd thiaj tsis ua raws li vajntxwv hais, nkawd tsis tua tej menyuam tub povtseg” (Khiav Dim 1:17).

c. *Mauxes niam* cawm Mauxes. Nws tau siv kev zais, muab Mauxes zais rau hauv ib lub tsev uas tsis muaj leejtwg paub (Khiav Dim 2:1-10). Tom qab ntawd nws cia luag pab tu kom nws tus tub muaj ib thajchaw nyob ruaj khov, loj hlob, thiab ua tiav Vajtswv lub homphiaj.

- “Tus vajntxwv ntawd ua phem rau peb haivneeg, tsimtxom peb cov yawgkoob tsis pub lawv tu lawv tej menyuum thiab yuam kom lawv muab lawv tej menyuum mos povtseg kom tuag mus. Thaum ntawd yog lub sijhawm yug Mauxes, Mauxes yog ib tug metub uas zoo nraug heev. Nws niam nws txiv tu nws hauv tsev tau peb lub hlis, thiab thaum nkawd koj Mauxes mus tso rau nram ntug dej, Falaus tus ntxhais txawm koj mus tu thiab saws ua nws tub” (Tes Haujlwm 7:19-21).

d. *Aunpadiyas* cawm 100 tus cev lus kom tsis raug Yexenpees tua uas yog nrhiav ib thajchaw nyob ruaj khov rau lawv nyob.

- “Aunpadiyas tau koj cov cev Vajtswv lus ntawd ib puas leej mus zais rau hauv ob lub qhovtsua, ib pab tsib caug leej, nws xa zaub mov thiab dej mus rau lawv noj thiab haus” (1 Các Vua 18:4).

e. *Lajhaj* cawm cov tub soj tebchaws. Nws siv kev hais lus dag (muab cov tub soj tebchaws zais thiab dag kom cawm tau lawv) thiab nws tau txais kev qhuas vim qhov uas nws ua ntawd (Yausuas 2; Yakaunpaus 2:25).

f. *Coob leej* koom siab koom ntsws tawm suab cawm Yaunathas.

- “Tiamsis cov neeg hais rau Xa-ules hais tias, ‘Koj yuav muab Yaunathas, tus uas pab tau cov Yixalayees kovyeej loj npaum li no tua povtseg los? Yog koj tua nws, peb yeej tsis zoo siab rau koj li! Peb thov coglus rau tus Tswv uas muaj sia nyob hais tias, txawm yog Yaunathas ib txoj nyuag plaubhau los tsis pub kom poob. Tej uas hnuv no nws ua yeej yog Vajtswv pab xwb.’ Yog li ntawd, sawvdaws thiaj pab tau Yaunathas dim tsis raug tua tuag” (1 Xamuyees 14:45).

g. *Exethaws* tau cawm nws haivneeg kom tsis raug tua tu noob los ntawm qhov uas hloov kevcai. Nws muaj lub siab tawv muab nws txoj sia koj mus tawm suab pab cov uas raug teem tias yuav tsum tuag (Exethaws 3:9-13 thiab 4:14-16). “...kuv yuav mus cuag vajntxwv. Yog hais tias, kuv ua txhaum kevcai, kuv tuag los xijpeem!”

i. Tswv Yexus qhia kom peb siv tej kabke thiab tej yam uas peb muaj mus *pab cawm* tibneeg txoj sia raws li tus neeg Xamalis siab zoo (Lukas 10:25).

## 2. Tej qauv thiab kabke hauv keebkwm

a. *Tiam thib ib*: Nyob rau tiam thib ib, ntawm tebchaws Loos, kev kaus menyuum thiab tua cov menyuum mos liab mas ntau heev. Tom qab ntawd, Vaj Ntsujplig, tus uas tsa Tswv Yexus sawv hauv qhov tuag rov qab los, tau puv npo hauv cov ntseeg tshiab. Lawv sib qhia hais tias, “tsis txhob tua menyuum uas yog muab kaus thiab tsis txhob tua ib tus menyuum mos liab tus hlo li” (Qhov no tau sau tseg rau hauv 12 tus timthawj tej lus cob qhia). Lawv cawm tej menyuum thiab koj los tu. Lawv pab tej pojnim suab menyuum kom tseg tus menyuum.

b. *Tiam thib peb*: Augustine muab tej txivneej lub siab phem uas kaus menyuum nthuav tawm. “Lawv yuam tej pojnim siv tshuaj kom tsis muaj menyuum, yog ua tsis tau li ntawd lawv yuav tua kom cov menyuum tsis tau yus los tuag mus.”

c. *Tiam thib tsib*: Justinian qhia hais tias, “Tus uas nrhiav pom tus menyuum yuav tsum tu thiab hlub raws li txojkev ntseeg. Peb yuav tau koj lawv los saws ua menyuum ib yam li peb tau saws ua menyuum hauv lub tebchaws koob hmoov.

d. *Tiam kaum rau (tiam txhim kho)*: John Calvin hais tias, “Txawm yog qhia txog qhov tseeb ntawm Vajtswv los tawmtsawm Xatas tej kev dag lossis tivthaiv cov neeg tsis muaj txim... los peb yeej yuav raug lub ntiajteb tawmtsam thiab saib tsis taus, tej zaum yog yus lub tebchaws, yus txoj sia, yus tej cuab yeej cuam tam, lossis yus lub koob npe.”

e. *Tiam kaum cuaj/ nees nkaum*: Nyob Eedias, tus tub xa Moo Zoo William Carey tau tivthaiv qhov uas luag muab menyuum mos liab pov haiv dej rau cov ntses nab qa noj. Nyob Afrikas, tub xa Moo Zoo Mary Slessor tau cawm cov menyuum ntxaib kom tsis raug tua tuag. Nyob rau txhua thajchaw uas muaj kev chem tsum cov ntseeg qhib tej tsev tu menyuum ntsuag, tsa tej tsev kho mob, thiab txais menyuum los tu. Cov ntseeg tau pab cov neeg uas qhev khiav dim nyob tebchaws Amelikas. Cov ntseeg tau cawm cov tub xa Moo Zoo dim tiam

uas Suav tua cov neeg txawv tebchaws. Cov ntseeg tau cawm cov neeg Yudais kom tsis raug cov Yelemees tua tu noob nyob sab Yulaub.

### 3. Tej qauv thiab kabke tiam tshiab – NIMNO

- a. Pab daws teebmeem suab menyuam. Nimno, cov ntseeg tabtom pab cawm txoj sia los ntawm qhov uas mus cuag thiab cawm tej poj niam lossis tej nkawm uas muaj kev nyuaj siab thaum suab menyuam. Nyob rau ntawm txhua tus, sawvdaws tabtom ua zoo li tus neeg Xamalis siab zoo, mus pab thaum lawv pom cov uas muaj kev nyuaj siab vim suab menyuam. Nyob ntawm tej pab, cov ntseeg thiab Pawgntseeg tabtom qhib tej koomhaum Kev Pab Thaum Suab Menyuaam thiab Tsev Rau Cov Poj niam Suab Menyuaam. Tshaj li 6000 tes haujlwm zoo li ntawd twb tau ua thoob ntiaj teb nyob rau 50 lub xyoo dhau los lawm. Nyob hauv tej ntawd muaj kev sim menyuam tsis yuav nqe, tsoom menyuam, pab qhia kom paub txog menyuam meej thiab daws tej teebmeem nyuaj siab. Tej haujlwm uas ua ntev muaj xws li nqis tes mus pab, ua siab dawb siab zoo, thiab pab tu menyuam kom loj hlob lossis puag coj los tu.

Yuav tsum ua thiab hais li cas?

- Qhia tshwm kev nkag siab. Hais tias: Kuv nyuaj siab heev thaum pom koj zoo li no.
  - Mloog thiab kawm. Hais tias: Thov qhia rau kuv paub vim li cas nyuaj suab menyuam lub sijhawm no.
  - Qhia. Nug: Koj paub li cas txog koj tus menyuam? Yuav kaus povtseg? Nrhiav lwm txoj haukev?
  - Cia li ua li ib tus neeg Xamalis siab zoo. Hais tias: Kuv yuav pab koj tseg koj tus menyuam. Peb cia li los nrhiav haukev.
- b. Tsomkwm txoj sia raws li txoj kev ntseeg: Cia li txhim tsa kev pab txoj sia nyob rau yus tej kev coj noj coj ua.
- i. Hais sau zog teebmeem:
- Txhob txwm tua neeg yog txhaum.
  - Kaus menyuam yog txhob txwm tua ib tus tibneeg uas tsis muaj txim.
  - Vim li ntawd, kaus menyuam yog ib yam uas ua tsis yog kev tsis yog cai lawm.
- ii. Siv kev tshawbfawb (saib ntawm lo lus nug 1) los mus teb lo lus nug “Menyuam yog dabtsi? Nws puas yog tibneeg?”
- iii. Siv kevcai ua zoo los qhia hais tias txhua tus tibneeg puavleej tsimnyog tsomkwm thiab sib txig sib luag. Feem ntau thaum sawvdaws pom luag muab ib tus menyuam tua thaum nws muaj 2 lub xyoos mas lawv yuav tsis lam txaus siab lossis hais tias qhov ntawd tsis txhaum li (raws li kevcai ua zoo). Tiamsis tibneeg ho siv zog hais daws lawv zaj kom tau kaus menyuam uas hais tias menyuam mos txawv li tus uas muaj 2 xyoos. Lawv yuav pheej hais txog 1 ntawm 4 yam hauv qab no, tiamsis yog koj ntseeg hais tias txhua tus tibneeg puavleej sib txig sib luag ces yeej tsis muaj ib yam twg yuav pab rau kev kaus menyuam ho li.
- a) *Tus menyuam uas tsis tau yus los ces tseem me.* Yeej yog li ntawd! Lub lwg ntshav me tshaj tus menyuam uas nyuam qhuav paub mus kev, tus uas nyuam qhuav paub mus kev me tshaj tus uas yuav tiav hluas. Txoj cai sib txig sib luag tsis saib los ntawm qhov uas loj lossis me. Feem ntau txivneej loj me ntshis poj niam, yog li lawv muaj cai ua neej ntau tshaj puas yog?
- b) *Menyuam tseem nyob hauv niam plab.* Yog los maj! Tiamsis thajchaw uas koj nyob tsis tau txhais tias koj yog leejtwg. Lub chaw tsis ntsis txog lub ntsiab uas sib txig sib luag. Tsis yog thaum koj nyob hauv tsev ces koj yog tibneeg tshaj li uas koj nyob nraum zoov. Yeej tsis muaj ib yam dabtsi ntawm tus menyuam uas yug dhau hauv lub tsevtub tawm los – ntev li 1 ntos xwb – yuav hloov tus menyuam uas tsis yog tibneeg dhau mus ua tibneeg li.
- c) *Tus uas tsis tau yug los ces tsis paub dabtsi.* Yog thiab! Tiamsis tus menyuam uas nyuam qhuav txawj mus kev tsis tau paub tab cuag li cov uas yuav tiav hluas. Cov uas tabtom raug phais vim kab mob tsis paub dabtsi li thaum uas lawv xeev xwm, tiamsis lawv txoj cai ua tibneeg yeej tsis ntau lossis tsawg raws li qhov uas lawv nco tau lossis tsis nco. Yog thaum lawv tsis nco ntawd yus muab lawv


txiav cajdab kiag no puas yuav raws kev raws cai, lawv tsis nco lawm lawv txawm tsis muaj feem ua neeg lov?

- d) *Tus uas tsis tau yus los tseem vam khom yus.* Yog! Tiamsis tagrho tej menyuam mos, menyuam me, thiab txawm yog tej uas yuav tiav hluas los tseem vam khom yus. Cov laug thiab cov uas muaj mob puavleej vam khom lwm tus. Cov uas siv insulin (tshuaj ntshav qab zib) yeej tsis lam tsis tau cai ua tibneeg li. Vajtswv hais tias cov uas muaj kev cheem tsum yuav tsum tau txais kev pab tsis yog muab tua povtseg.
- c. Nthuav tawm kev phem. Txhua tus yuav tsum ntsia pom txojkev tsis ncaj ncees kom tsis txhob ua. Tej yam tsis ncaj ncees pheej ua nyob hauv qhov tsaus ntuj (ua twjywm). Vim li no, Efexus 5:11 thiaj hais tias: "Tsis txhob mus ua phem ua qias... yuav tsum muab tej ntawd los nthuav rau qhov pom kev." Qhov no yeej phim heev rau kev kaus menyuam heev, thaum muab kev kaus menyuam nthuav tawm los, sawvdaws yuav pom tias tsis ncaj ncees hlo li, thiab yuav tsis pub ua li ntawd.

### Ntawm no yog kev kaus menyuam



8 thiv



9 thiv



10 thiv



11 thiv

Yog xav tau ntaub ntawv ces rub nqis ntawm no: [www.baovemamsong.org/tai-lieu/tieng-hmong/](http://www.baovemamsong.org/tai-lieu/tieng-hmong/)

Xav tau kev pab? Hu rau peb:

Xovtooj: 034-2244-820

Email: [baovemamsong@gmail.com](mailto:baovemamsong@gmail.com)

Web: [www.baovemamsong.org](http://www.baovemamsong.org)